

## CODINTO YACNOCQUIDON ISTE 2

<sup>1</sup> Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ëbëd iquec. Aid ëbëd icnubi Esuquidistu tantiec Codinto yacnoësh iccuededquidon mimbi iste dada uaimbi. Ēmbi dada uaid mibitedishun isbanshun utsibo meneta ma isnueshun.

<sup>2</sup> Matses icsaquid icsho cuidnushe quiash abided ciudadec Esuquidistu unëspaniedash, quequin tantiaquiosho isun Nuquin Papan bëdamboen isaidquio nuqui nec. Adquido yec utsibobëd ma bëdamboec tabadpanuna.

### *Bëdambo icmianquidquio Nuquin Papa*

<sup>3</sup> Nuquin Papa nad iqueque. Tantia. Chuinu. Ēbi unësquio icsho isash bëdambo icmianquidquio Nuquin Papa nec. Adquid icsho, Mibi bëdambo iquec, quequin aidquio chuidonenuna.

<sup>4</sup> Natiamiaid icsho tantiaquin chieshtomenquiocquin aidëmbi nuqui dayacquio icmec. Aden ëbi tantiaquin Nuquin Papan nac, quequin natiamiaid utsi icsho tantiaquin, Bëdambo iquebi, camenuna nuqui.

<sup>5</sup> Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac.

<sup>6</sup> Adembidi ëbipadquidobëdtan Esuquidistu chuibansho utsibon mëyanac natiamiaid icsho Nuquin Papan, Bëdambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ëbi mëyansho isun adomboembidi chieshtomenquiocquin Nuquin Papan ëbi dayacquio icmec, quec tabadta.

<sup>7</sup> Utsin mëyanaid icquimbi Esuquidistu tantesa uainquio iquec, quequin mibi tantiec tsadebi. Ëbi mëyanacpaden mibi mënyansho isun Nuquin Papan bëdambo icmiaid mibi iquendac.

<sup>8</sup> Nidaid Asia caid yacnoshon ëbi natiameboed mimbi tantiamboen icchitec, quequin ëbi adoboed mibi chuibanu. Tantia. Dayactiapimbocnoc natiamioshi. Adoac, Unësebi, quiobi.

<sup>9</sup> Unës uatiad, utsibo qesho tantiash, Ëbibi mënchiquidtiapimbocquimbi matses unësacsho uincuemequidën ëbi mënchictsiash, quequin tantiec tsadobi.

<sup>10</sup> Ai, unës uanu, cac natiapobi. Adsho Nuquin Papan mënchicaid nebi. Adembidi aidëmbi ëbi mënchicteneç. Unës uatsensho isun ëbi mënchicacpaden ënenquiocquin napashun, quequin tantiec tsadebi.

<sup>11</sup> Ëbi tantiaquin mibitedishun chiac Nuquin Papan mënchicmiaid nebi. Aden mimbi chiac unës uanu, qesho tantiashun mimbi Pabado mënchiccoc. Mibi bëdambocquid nec, Papa, quequin ma dadpeshun ambi naid chuipanuna.

*Nëbi mibi yacno nidenquio iquebi, quiaid*

<sup>12</sup> Bëdamboec tabadquin ismequid nebi, quequin tantiec bëdambo iquebi. Adaid chuinu. Tantia.

Nuquin Papan ëbi tantiamiacpaden ismec utsi-bobëd bédamboec tabadobi. Adquiecbidi mibëdi tabadobi. Matsesën tantiamiacpadpenquo yec tabadobi.

<sup>13</sup> Ma tantiamenueshun abimbo chuiquin mibi dada uashunec nebi. Ëmbi dada uaid bedshun isec, Pabado bédamboec tabadec, quequin ënenquiocquin tantiapashun mibitedishun.

<sup>14</sup> Èbëd Pabado bédamboec tabadosh, quequin tantiec bédambo iquebi, quec utsi-utsiec. Adecbidi, Codinto yacnocquido utsi-utsiec bédamboec tabadosh, quequin utsibon chuisho tantiash bédambo iquebi. Esuquidistu choanuc adquiequi Codinto yacnocquido tabadpashun, quec tsadebi.

<sup>15</sup> Aden ëbi bédamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bédambo iquebi, quepashun, caimbi mibi.

<sup>16</sup> Mibi isbidanec nidaid Masedonia caid yacno nidashic padpiden mibi isbëtsenec choaibi. Aden isbëtsenembi, qesho tantiashun nidaid Udeya caid yacno mimbi ëbi nidmetsiac, quequin mibi chiombi.

<sup>17</sup> ¿Uquëducshun, Nidenquo iquebi, quequin muaquindambi chuidio? Adenquiocquin chiombi.

<sup>18</sup> Ambi chiacpadomboen nabanquidquo Nuquin Papa nec. Aid chuinu. Tanta. Abimbo chuiquidquo yec utsi yantiapimbo iquec. Adquidquo icquin ambi, Esuquidistu chuibeneta, caidquo yec adomboen chuiquid nebi. Utsi uain chuinu, quesa nebi.

<sup>19</sup> Ambi chiacpadomboen nabanquidquo

Nuquin Papan Madombo, ěmbi chuibeniaid, Esuquidistu nec. Aidi Sidasĕn chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquio yec utsi yantiapimbo iquec. Abi chuibenequidquio adquidbidi nec.

<sup>20</sup> Con Madon naden naindac, quequin Nuquin Papan chiacpadomboen Esuquidistun ěnden nabanac. Aden abi nabanec. Ambi chiacpadomboen naquidquio Esuquidistu nec, quequin tantiaquin ambi naid ěbipadquidon chuibanec. Aden chuibanac abi tantiaquidquio yanash, Abimbo iquec. Esuquidistun ambi chiacpadomboen naindac, quec tantiec nuqui tabadec.

<sup>21</sup> Nuquin Papan tantiamiac: Esuquidistu tantiaquid nebi, quiash, Tantiesa nebi, quetiapimbo nuqui iquec. Adquid icmiac aton Madombo chuibanquid nuqui nendac.

<sup>22</sup> Adembidi aton bacuĕ icmiaid nuqui nec. Adembidi aton Mayan Nuquin Papan meniaid nuqui nec. ěbĕd tabadquid aido nendac, quequin tantiamenuen Nuquin Papan aton Mayan meniac ma aidĕmbi nuqui bĕdambo icmepanueshun.

<sup>23</sup> Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquio iccobi.

<sup>24</sup> ěmbi Esuquidistu chuibanac abi tantiaquid dadpen iquec. Aidon icbopenquio nebi. Aidon icbopenquiobidi Esuquidistu chuibanquid utsibo nec. Esuquidistu tantiec bĕdambo iquebi ma quenu, quequin chuibenequidquio nebi. Esuquidistu tantiaquid nebi, abimbo quequin aid

tantesa uainquo mimbi iquendac.

## 2

<sup>1</sup> Aden tantiaquin comapenen chuiquin unësquo icmenushe quec mibi yacno nidenquo iquebi caombi.

<sup>2</sup> Mibi unësquo ëmbi icmiac ¿tsuntsin ëbi bëdambo icmepatsiash? ¿Ëmbi icsambo icmeboedënda ëbi bëdambo icmepadic? Padenquo.

<sup>3</sup> Aden tantiaquin mimbi iste dada uaombi ma ëbi bëdambo icmequid unësquo icmetiapimbo iquebi, queshun. Bëdambo iquebi, quequin ëbi tantiec adquiobidi mibi icoatsiac, quequin tantiombi.

<sup>4</sup> Unësquo yec shubiquimbi mibi dada uashun, Meneta, caondambi. Unësquo icmenu, quenquiocquin mibi comapenen tantiaquin dada uaondambi.

### *Abi icsaboed bëpiscudnueshun yued quiaid*

<sup>5</sup> Anocquidën ëbi unësquo icmedenequimbi adembidi comapenquiec unësquo mibi icmeoaosh. Aidi mibi chiondambi.

<sup>6</sup> Aidi mibi dadpenshun cacumiac abi icsaid ënosh quec.

<sup>7</sup> Adoacsho abi icsaid bëpiscudshun aidi yuedoquin bëdambo icme. Yuedenquo yac natiamianquiec unëstiadquo yantsiash.

<sup>8</sup> Nuquibi iccuedednuna, quequin aid tantiaquin yued caimbi.

<sup>9</sup> ¿Ëmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi.

<sup>10</sup> Aden ëmbi dada uacpaden mimbi cacumiac abi icsaid ënsho isun abi icsaid nibëdacbimboec bëpiscudshun yued. Adsho tantiashun adomboembidi naimbi. Aidbëdi abentsëc yacbimboecquido yanosh, qesho tantiash abi icsaid bëpiscudebi Esuquidistun tantianubi.

<sup>11</sup> Nuqui chieshëncquidën Satanasën aidi icsamenushe qeshun abi icsaid ëmboed yuedta. Yuedenda, Satanasën quequin tantiamiac onqesho tantienda.

*Nuquin Papan con Mayan meniaid adquid ëbëdi tabadtequid nec, quiaid*

<sup>12</sup> Esuquidistu chuibanuec shubu dadpen icquid Todoas caid yacno ëbi chonoc, Tantianu, quec cho-choquid dadpen icpondash.

<sup>13</sup> Adquid dadpen icnubi ëmbi con utsi caid, Tito, mibi yacnoësh choabi icnuc ambo yuec tabadtiapimbo iccobi. Adash, Bëquednu, quianec nidaid Masedonia caid yacno nidoapobi.

<sup>14</sup> Bëdambocquid mibi nec, Papa. Mimbi Esuquidistu tantiaquid ëbi yacpadquido icmeshun mimbi, Esuquidistu chuibeneta, caid ëbitedi nec. Ëmbi chuibanaid noadte bëdabimboecquid nec. Noadte bëda pushudec noadsho uano-uanoec tabadquidon shëdec. Adembidi, Esuquidistu ëbi yacpadquidon chuibenesho uano-uanoec tabadquidon tantiec.

<sup>15-16</sup> Esuquidistu chuibanac noadte bëdan danoshquiaid shëdacbimboen utsibon tantiec. Adembidi, Esuquidistun ëbi chuibeneta caido Icho isacbimboen Nuquin Papan tantiec. Adomboembidi Esuquidistu chuibenequido

utsibon isoaic. Aden isec Esuquidistu tantiaquid yanash ënëdenquio yec abëd icquido aidtedi iquendac. Aden nuqui isquin Esuquidistu tantiesa icsho Nuquin Papan nësiatequid iquendac. ¿Tsutsi Esuquidistupadquidquio icpec? Adquid nibëdec. Adesa icsho ambi, Ëbi chuibeneta, caidquio nebi. Adquid icquin chuibenenubi

<sup>17</sup> piucquid bedte bunquin utsin-utsinquien Esuquidistu chuibanec. Adesa ëbipadquido iquec. Piucquid bednuequin ëbi yacpadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

### 3

<sup>1</sup> ¿Pabado bëdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bëdamboec tabadquin Esuquidistu Pabadon chuibanosh, quequin dada uata, ëmbi cac mimbi dada uaidtambi buampe? Padenquio.

<sup>2</sup> Mibëdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chëshëten pinchuquën tansiacbimboecnuc paucudtiapimboenoc Nuquin Icbon tantiamioishi. Adembidi icsamboec tabadboedi nëbi bëdamboec tabadsho isun Pabadon Esuquidistu chuibanaido Codinto yacnocquido nec, quequin adomboembidi tantiabededec utsibon.

<sup>3</sup> ¿Abi tantiaquid icsho isun bëdamboec tabadmenuequin ambi cuënote bedshun dada uampicpadquidta mibi meniondash? Padenquio. Es-

uquidistu tantiasho isun unëstiapimbocquid aton Mayan abipadquidquo mibitedi meniondash.

<sup>4</sup> Nuquin Papan tantiacpadomboen Esuquidistun, Ëbi chuibeneta, cac chuibanac Esuquidistu tantiaquid mibitedi yanacsho tantiec ëmbi chuibanaido aidtedi nec, quequin tantiembi.

<sup>5</sup> Ëmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiembi.

<sup>6</sup> Ëmbibi Esuquidistu chuitiapimbo icsho Nuquin Papan Mayanën tantiamiac Esuquidistu chuibenequidquo nebi. Ambi, Nadomboen nata, quequin dada uamiampicpadomboen chuibanta caidpenquo nebi. Ambi nadomboen nata, quequin dada uamiampidtedi natiapimbo yec aidbëdi matses tabadtiapimbo iquec. Aton Mayan meniaidbëd tabadtequid nec.

*Abi tantiaquido bëdambo icmetequid aton Mayan*

<sup>7</sup> Nuquin Papan nadomboen nata quequin chiaid cuënoten dada uacpaden nainquo yec matses abi yacno tabadtiapimbo iquec, quequin dada uampid meniac abi chënquiacpadec Moisesën bëtantiate comapenec bëchomuanquiec chënqueboedi macuësh budec bëdiambo chënquesho isadaidbon bëstiapimbo icpampic.

<sup>8</sup> Nëbi Esuquidistu tantiaquid bëdambo icmequid aton Mayan abipadquid meniaid ënëdenquiocquidquo nec.

<sup>9</sup> Ëmbi nadomboen nata quequin chiaid niacquid ëbëdi tabadtiapimbo iquec, quequin dada uaid Nuquin Papan meniac buanshun Moisesën aton matses ënëdenquiocnoc



tabadmetiapimbo icambien matses icsaid bedshunash icsaisa abided ciudadec unēsash uincuenquidēn abi tantiaquido enēdtiapimbo noc tabadmendac.

<sup>10</sup> Nēbi Esuquidistu unēsaid tantiaquid enēdtiapimbo quid nec, quequin chiac ambi dada uaid meniampid enēdac bimboec quid nendac.

<sup>11</sup> Ai, nadomboen nata quequin chiaid Moisesēn bedshun meniaid enēdtequid icnubi bēdambo icmiantequid Nuquin Papan chomiaid icsaisa enēdtiapimbo iquec.

<sup>12</sup> Aden tantiaquin, Esuquidistu nuqui tantiaid icsaisa yec enēdtiapimbo quid nec, quequin chuibenequid nebi.

<sup>13</sup> Moises Nuquin Papabēd onquec bēchomauanquieboedi auēshquio nidec ushmaushmactsēcquio yanash matses ismenquiocnuec bēpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec.

<sup>14</sup> Nuquin Papan dada uaid Moisesēn bēaid tantiate bunesa abēd icquido icpampic. Adquibidi pamumēdac bimboec isadaidbo abi tabadec. Nuquin Papan cuēnoten dada uacpadquid isec onquec nēbi adquibidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac.

<sup>15</sup> Nadomboen nata quequin dada uaid Moises menepampid isec onquec pamumēdac bimboec quid isadaidbo utsi-utsiec iquec.

<sup>16</sup> Esuquidistu tantiaquid icsho Nuquin Papan Mayanēn paucquin tantiamiaid nendac.

<sup>17</sup> Nuquin Icbo icsaisa icquin enden nadomboen

nata quequin dada uapampicpaden naquidquo nec. Adquid Esuquidistu nec, quequin tantiaquin chuibenec nebi.

<sup>18</sup> Paucac, Ēbi icsaid bedshunash Esuquidistuded cuidadpanēdash, quequin nuqui tantiec. Aidēnquiobi icsaisa icquin abipadquid nuqui meniac aton Mayanēn adquid nuqui icmebanec.

## 4

*Nuquin Papan nadatiambocquin nadenequin Esuquidistu chuibenemiaid*

<sup>1</sup> Aden Nuquin Papan nuqui tantiaquin, Esuquidistu chuibanta, caidquo icquin chieshenquiocquin aidi chuibanec nuqui nec.

<sup>2</sup> Icsash ompodquid icboedi nēbi muesa icquin Nuquin Papan chiaid utsi uainquo yec nuqui bēdamboec tabadec. Nuquin Papan isec, quec adequi nuqui tabadec. Adec tabadec ēbipadquid utsi yansho isash Nuquin Papan chiaid tantiate utsibo bunquiopec.

<sup>3</sup> Ēsuquidistu chuibansho utsin-utsinquien bēdamboen tantiatipimbo iquec. Adquid Nuquin Papabēd tabadiapimbocquid nec.

<sup>4</sup> Nuquin Papapadquid Esuquidistu tantiaquid icnushe qeshun icsamianuequidēn Satanasēn pamunacimboen utsi-utsien tantiamenquo iquec.

<sup>5</sup> Ēmbibi naid chiesa nebi. Matsesēn Icho Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi.

<sup>6</sup> Abitedi uanuna, qeshun, “Inchēshquo icboedi uēshēmo yanquiota,” capampic Nuquin Papan. Adomboembidi Nuquin Papan chiaid

pamumëdacimboen tantienquioeboedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

<sup>7</sup> Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi.

<sup>8</sup> Aden chuibansho mëyanaqui abi chuibenec nebi. Padpiden-padpidemboen natiamiaqui, ¿Atotsimbi napeba? quesho Nuquin Papan dayacquo icmedenebi.

<sup>9</sup> Èbi chieshënquid dadpen icnubi ëbi bëdambo icmequid aidi iquec. Comapenen cuestanec, Unësec, queshun nianaqui abi Esuquidistu chuibenembi.

<sup>10</sup> Esuquidistu mëyanquin unës uacpaden mëyanquin unës uatsen-unës uatsenshobi dayacquo icmedenioshi. Adoacsho uincuenaidën dayacquo icmedeniaid nec, quequin utsibon isbededebi.

<sup>11</sup> Adembi Esuquidistu chuibansho unës uatsi-ashi, quequin chuibenec nebi. Aid chuibansho unës uatsenaqui abipadquid unësesa yanebi, quec bëdamboec tabadebi.

<sup>12</sup> Aden tantiaquin aid chuibanac abi tantiaquid yanash aibëdi tabadec unësesa mibitedi yanendac.

<sup>13</sup> Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi.

<sup>14</sup> Aden tantiaquin Nuquin Papan Esuquidistu uincuemiapaden aibëdi tabadmenuen mibited-ibëdtabi ëbëd icquidtedi uincuemendac, quequin

chiembi.

<sup>15</sup> Aid tantiaquid ma mibi icpanueshun chuibansho mëyanaid nebi. Mëyanaqui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bëdambo iquec, Papa, quequin ma Nuquin Papa utsibon chuipanuna.

<sup>16</sup> Aden tantiec dayactiapibi quenquio iquebi. Tsusio budquimbi badiadquidën-badiadquidënquien Esuquidistu tantiadonequidquio yanebi.

<sup>17</sup> Natiamiantequid ënëdendac. Natiamiaid yashic Nuquin Papa yacno tabadec bëdamboshë iquendabi. Esuquidistupadquid icsaisa yec unësesa yanash ënëdtiapimbo iquendabi.

<sup>18</sup> Aden tantiec, Ëbi natiamiaid iquec, quiashic, Nuquin Papabëd tabadendabi, quequin comapenen tantiec tsadebi. Ëmbi isaidtedi ënëdendac. Nuquin Papa yacnocquid ëmbi isacmaidtedibëd ënëdtemaid iquendabi.

## 5

### *Nuquin Papabëd tabadte iquendac quiaid*

<sup>1</sup> Con nami shë nibudash unësash nibëdnuc Nuquin Papabëd tabadec nami chuca uaid iquendabi. Nami chuca uaid ënëdtemaid matsesën nacenacmaid nec, quequin tantiembi.

<sup>2</sup> U abucquio nidabi yec uëshquequid nebi. Adquiocsho nami chuca uaid ënden meniondac, Cuishon, quetsiabi.

<sup>3</sup> Aden meniac ëbibimboec isadsho isendac, quec tsadebi.

<sup>4</sup> Nami chodquequid icnuc uëshquec nuqui tabadec. Nami chuca uaid chodquesa menepashuni mabi unësesa icpanu quec nuqui tabadec.

<sup>5</sup> Con Mado Esuquidistu tantiaquid ëbëd abuc tabadmenuen ëbipadquid unësesa icmenu, quequin Nuquin Papan aton Mayan menetequid nuqui nec.

<sup>6</sup> Aton Mayan meniaid iquec nami chodquetequid abi iquequi chieshenquoio yec dayacquio yec nuqui tabadec. Adec tabadash abuc Nuquin Icbobëd tabadendabi, quequin nuqui tantiec.

<sup>7</sup> Aton Mayan meniac nuqui isacmaid Esuquidistu cainec nuqui tabadec. Ëmbi isaid ëmbi caintemaid nec.

<sup>8</sup> Aden aid cainsho nami chodquesa badedquoio menepashuni. Aden meniac Nuquin Icbobëd iquendabi, quequin nuqui tantiec.

<sup>9</sup> Aden tantiec nidaidën tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiembi.

<sup>10</sup> Adembidi abi tantiaquidtedishun naid ambi chuibante ushë chonoc Nuquin Icbon chuibanendac, quequin tantiembi. Utsi-utsien, Mimbi bëdamboen nabanoc, quequin chuibanendac abitedishun naid cuidquin.

*Ma utsibotsen abi tantiaquid icpanu quequin chuibanaid*

<sup>11</sup> Aden ambi tantiacpaden nabansho, Bëdamboen mimbi nabanoc, Nuquin Icbon ëbi caindac, quequin tantiaquin ma utsibontsen Esuquidistu tantiapanueshun mibi chuibenec

nebi. Aid tantiaquin nabanec bēdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi.

<sup>12</sup> Aden tantiaquin, Mibi bēdambo iquec, ëbi camenuen mibi dada uashunenquio iquemi. Ëbi chienquiocquin, Bēdamboec tabadquin ismi-acbimboecquidēn ëbi icsamboen chuisho aido chuita, quequin mibi dada uashunemi.

<sup>13</sup> Aido, Pabaton tantiate icsabudosh quec. Adembidi, Nuquin Papan chiacpadomboen ëmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu qeshun aid chuibenec nebi utsibon chuibenenuiocnobi.

<sup>14</sup> Chian anēdēnquequid icsambocquid nēsianushe quiash matses icsaid bedshunash abided cuidadec icsaisa Esuquidistu unēsapanēdash, quequin ma utsibon tantia-panueshun chuibenec nebi.

<sup>15</sup> Ma ëmbi naid chiac ëbi tantiaquido ma ebēdi icpanu, quiash unēsash uincuempanēdash Esuquidistu.

<sup>16</sup> Adec unēsash Esuquidistu uincuempanēdash, quequin matses unēsash uincuenta iquec, quequin abi tantiaquidon tantiec. Ënden, matsesquio Esus nec, quiondaidi nēbi, Nuquin Papan Chomi-aid yec matses tantiec unēsash uincuempanēdash, quequin tantiemi.

<sup>17</sup> Abi tantiaquid ambi tantiamiaid nec. Ënden matsesēn tantiacpadquiec icboedi Esuquidistun tantiacpadquiec bēdamboec tabadec

abi tantiaquidquo.

<sup>18-19</sup> Nuquin Papan ëndenquimboshë tantiampicpaden Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided ciudadec Esuquidistu unëspanëdash, quequin tantiaquin ma aidquo utsibon tantiapanu qeshun ambi naid nuqui chuibenec.

<sup>20</sup> Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ëbi icsaid bedshunash Esuquidistuded ciudadpanëdash, quequin abëd icnuequin aid tantiaquiota.

<sup>21</sup> Ambi cuidtiadquid nuqui icnubi Esuquidistu icsaisaded Nuquin Papan cuidpanëdash ma Esuquidistu ambi cuidaidpadquid tantiaquidtedi icsaisa yampaneshun.

## 6

<sup>1</sup> Matses bëdambo icmenu, quequin Nuquin Papan chiaid bëpiscudmane qeshun ambi tantiamiacpaden nabanec tabadta.

<sup>2</sup> Nuquin Papan chiampid chuinu. Tantia.  
“Mibi bëdambo icmete ushë chonoc cuënsho tantiamiombi.

Tantiesa icboedi nëid ushënquo mibi tantiamiombi.”

Aden Nuquin Papan chiampicpadomboen bëdamboen tantia. Nëbi Nuquin Papan bëdambo mibi icmenu cac, Ai, cata. Nëid ushënquo ambi aton bacuë icmete ushë nendac.

*Pabado natiamiaid*

<sup>3</sup> Icsamboec tabadquimbi Pabadon Esuquidistu chuibansho, Tantiatiapibi, utsibo quetiapimbocnoc bēdamboec tabadec nebi.

<sup>4</sup> Nuquin Papan chuimiaid yec nadec tabadebi: Chieshenquo yec dayacquiocquin ambi chiaid chuibenec bēdamboec tabadec nebi. Natiamiaid yec adequi tabadebi.

<sup>5</sup> Utsin cuesaqui adequi bēdamboec tabadebi. Quēnēn nauedaqui adequi bēdamboec tabadebi. Nuquin Papan chiaid ěmbi chuibanac cuesnanubi padenquo yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunquiec bēdamboec tabadebi.

<sup>6</sup> Icsainquo yec bēdamboec tabadebi. Nuquin Papan chiaid tantesa uainquo yec bēdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, queshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquiocquin utsi abimbo tantiec adecbidi tabadebi.

<sup>7</sup> Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibon abi icsaid ěmpanueshun.

<sup>8</sup> Ĕbi chiec: Pabado bēdambo iquec, quenubi adequi tabadebi. Utsin ěbi chuioaic: Pabado icsambo iquec, quenubi adequi bēdamboec tabadebi. Ĕbi icsamboen chuinubi adequi



bëdamboec tabadebi. Èbi bëdamboen chuinubi adequi bëdamboec tabadebi. Muaquid nec, quenubi abimbo chuiquid nebi.

<sup>9</sup> Èbi isquidëmbi, Èmbi isacmaid Pabado nec, caqui ëmbi chuibansho tantiaboedo nec caimbi. Èbi unës uate bunubi abi chuibanec capucuenebi. Mëyanaqui unësabi yec nidebi.

<sup>10</sup> Unësquio icmiaqui Esuquidistu tantiec bëdambo iquebi. Con na nibëdsho isun adembidi Esuquidistu chuibanec nebi ma Esuquidistu tantiec utsibo bëdambo icpanueshun. Con na nibëdsho isash Nuquin Papan bacuë yec aton natedi con na nec, quequin tantiec tsadebi.

<sup>11</sup> Chuitiapibi, quenquiocquin ëbi natiaboedtedi mibi chuibanombi. Mibi comapenen tantiaquin ëmbi nabanaid mibi chuibanombi.

<sup>12</sup> Mibi tantiaquioquin chuibanquid ëbi icnubi ëbi tantiaquin chienquio mimbi iquec.

<sup>13</sup> Pabadon con bacuëbo caido nebi, quequin mimbi naid mimbi tantiaidbëdta ompoenquiocquin ëbi chuiban, caimbi mibi.

### *Esuquidistu tantiesabëdtambi icsain nainda quiaid*

<sup>14</sup> Esuquidistu tantiesabëdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, quesa aton papa. ¿Nuquin Papan bëdambo icmiaidënda ambi chiaid niacquidbëdtan nabampadic? ¿Nuquin Papan Mayanën tantiamiaidënda Icho chieshënquidbëdtambi chieshëmpadic?

15 ¿Esuquidistu Satanaspadquidta nedic? Padenquio. ¿Esuquidistu tantiaquid abi tantiesapadquidta nedic? Padenquio.

16 ¿Nuquin Papan ambi uaidbimboecnuc mat-sesën nacnenaïd tantiaquidta aton Mayan Nuquin Papan meniaïd icpadic? Padenquio. Abi tanti-aquid aton Mayan menec. Nuquin Papan dada uamiampid dada uanu. Ista.

“Ëbëd icquidbëd iquendabi;

Aidbëdi capuebi;

Aton papa nebi;

Con matses adquido nec,

17 Con matses icquin ëbi tantiesan ëmbi chiaïd niacacpadomboen nainda.

Adecbidi aid icsacpadec tabadenda.

Adecbidi icsainquio yec tabad.

Adquid ëbëd iquec cho caindambi.

18 Adquidon papa iquendabi;

Adquid ëmbi con madobëd con champi caïd iquen-dac, quec Nuquin Papa.” Abi tantiaquido nadatiambocquidën aden chiec.

## 7

1 Naden nanuna, quequin Nuquin Papan chiac nuqui naïd icsatedibëdtabi nuqui tantiaïd icsatedi ënu, quequin Nuquin Papan chiacpadomboen na-banec tabadtenenuna.

*Unësquo icboedi mimbi naïd tantiash bëdamboshë iquebi quiaïd*

2 Adembidi, ëbëdtabi ëbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi.

<sup>3</sup> Pabado tantienquo yec icsaobi mibi camenuen nēid chuiquin dada uainquo iccombi. Mibitedi tantiec tsadebi, quequin padpiden chiemi. Abimbo caimbi. Unēsequi mibi bēshuntiapimbo iquendabi.

<sup>4</sup> Mimbi chiacpadpenquochoedēmbi naosh, quequin choquidēn chioši. Aden chuisho tantiashun, Nuquin Papan chiacpaden nabanquidquo nec, quequin mibi chiec nebi. Unēsquo icboedi mimbi naid tantiash bēdamboshē iquebi. Utsin natiamiaid icshobi bēdambo iquebi, mimbi ēbi camioc.

<sup>5</sup> Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedēmbi tantesa uatsiash, quec quenenenquo iccobi.

<sup>6</sup> Unēsquo icsho ēbi tantiaquin Nuquin Papan Tito padpiden chomiosh ēbi bēdambo icmeoanuen.

<sup>7</sup> Choashun mimbi aid tantiaquin nabanaid Titon chioši. Adembidi, ēbi iste mibi bunaid chioši. Mimbi dada uaid isash unēsquo icquin, Codinto yacnocquidon mimbi chiacpaden nabanosh, quequin Titon chioši. Aden chiac bēdamboshē yanobi ad yenquo icboedi.

<sup>8</sup> Mimbi dada uaid isash Codinto yacnocquido unēsquo iccosh, quesho tantiash, Icsambo icchitobi, quenquo iquebi. Aden dada uaic icsambo iccobi, quetiapimbo yequi mibi unēsquo yacpadequi unēsquo iccobi. Yuec mibi ad yenquo iccoc.

<sup>9</sup> Adecbidi nēbi bēdambo iquebi. Ēmbi mibi unēsquo icmiac mibi icsaid ēnquin Nuquin Papan chiacpaden nabanec, quec utsibo. Aden chuisho tantiaquin mibi unēsquo icmequin mibi

icsabudmiambo iccombi. Unësquio icmiaqui mibi bēdambo yanoc.

<sup>10</sup> Unësquio icmiac, Nuquin Papan chiaid niac-combi, quiash unësquio icquin mibi icsaid mimbi ënac. Adsho isun Nuquin Papan ënēdtiapimbo noc aidbēd mibi icmendac. Aden unësquio icmiaqui, Bēdambo iquebi, mibi quendac. Adecbidi mibi icsacpadec icsainquio mibi icpendac. Padnuen Nuquin Papan chiacpaden niacquin ënesa abi natiamiauidi tantiec Nuquin Papa yacno puduedtiapimbo iquendac.

<sup>11</sup> Padnuen mibi unësquio icmiac nēbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ënoc. Adembidi, Ëbi padpiden bēdamboen is, quequin Nuquin Papa mimbi chioc. Icsashun chienquiochoedēmbi nēbi cuembo bēdamboen chuinu, quequin mimbi chuibanoc. Aden mibi icsaid ënacsho isun mibitedi icsaquin ëntiapimbo icquidën nacpaden naisa nec, quequin tantiembi.

<sup>12</sup> Icsaquid ambi icsa uanaidbēdtabi chuinen mibitedi dada uainquio iccombi. Abentsēc icsash abitedi unësquio iquec. Adquiecbidi ëbi unësquio icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin

<sup>13</sup> ëmbi tantiacpaden naquin mimbi bēdambo iquebi camiaid nebi.

Adembidi Tito yuedquin mimbi bēdambo iquebi camiaidbidi niosh. Ëbi yuedenquioctsiash queboedi niosh. Yuedoshi, Tito quesho tantiaash

bëdamboshë iquebi.

<sup>14</sup> Mibi nidmembi, Tito, qeshun, Ëbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ëmbi chuibocpadomboen mimbi nashunac. Aden tantiash, Abimbo chiombi, quepobi. Ëmbi mibi muainquiocquin chuibanacpade adquiobidi mibi nabanec tabadaid abimbo iccosh. Adomboembidi Titon mibi isbanosh.

<sup>15</sup> Èbitedi chushcatsiash, quequin mibitedishun Tito yuedpanëdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito.

<sup>16</sup> Adoaidi ambia tantiaquid icquin ëmbi chiac mibitedishun nabanendac, quequin tantiembi. Aden tantiec bëdambo yec tsadebi.

## 8

*Aton na nibëdquid icsho aton na dadpen icquid menequid*

<sup>1</sup> Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nëbi bëdamboen nabanec tabadaid chuinu. Tantia.

<sup>2</sup> Natiamiaqui bëdambo iquebi quec aido tabadec. Adec tabadquin Esuquidistu tantiaquid utsibo tantiaquin menenuequin aton na daëdpactsëc musucshun dayun uaosh.

<sup>3</sup> Ëmbi, Meneta, cainquiocnobi aton na bedtequid naimbudtsëcquien menenuequin bedbanosh.

<sup>4</sup> Esuquidistu tantiaquid utsibo, nidaid Udeya caid yacnocquido, aton na nibēdec natiaic, quequin chiac Masedonia caid yacnocquidon, Aido menenuna, quequin comapenen chuiposhi.

<sup>5</sup> Mitsana daēdpactsēc icnuc utsibo mimbi menetiapimbo icpec, quequin chuinu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi.

<sup>6</sup> Adomboen menenun bedbamposh. Adosho isun Tito nadombi. Mimbi ēnden nidaid Udeya caid yacnocquidon natiaid chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiactedta bedbanoshe? Isnu, qeshun istanta, quequin Tito chiombi.

<sup>7</sup> Naden naquid Codinto yacnocquido nec, quequin mibi tantiembi. Nuquin Papan Mayanēn tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin ēmbi chiacpadomboen badedquio comapenen naquidquio mibi nec. Adembidi ēbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

<sup>8</sup> Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi.

<sup>9</sup> Nuquin Icbo Esuquidistu abuc tabadec abitedishun Icbo icboedi nuquitsen abuc abëdi tabadmenuec matsesash nidaidën tabadnuc aton na nibëdpadenec. Aidën matses tantiaquin nabanacpaden utsibo tantiaquin nabanta.

<sup>10</sup> Ëmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimbi tauapondac.

<sup>11</sup> ¿Aden nanuna, qeshun mimbi chiated ënquina bedshun dayun uao? Padenquiocquin adota.

<sup>12</sup> Mitsana daëdpactsëc icnuc daëdpactsëc musucshun menesho isash, Dadpen meneta, quenquo Nuquin Papa iquec.

<sup>13</sup> Aton na nibëdquid icsho, Natiacquin meneta, quenquo iquebi. Aton na nibëdquid icsho aton na dadpen icquidën menec.

<sup>14</sup> Mitsana dadpen icquid mimbi musucshun meniac aton na nibëdquid bëdambo iquebi, quepec. Aden meniac mibëdi aton na nibëdquid bëdambo iquendac.

<sup>15</sup> Nuquin Papan dada uamiampid nad iquec. Chuinu. Tantia. Petequidëmpi Nuquin Papan mana caid meniaid chuiquin: “Shubun tabadquid dadpenshun aited-aitedquien bedbanshun peshun napi uaid nibëdosh. Adecbidi, aton shubun daëdpactsëc tabadquidon aited bedbanshun peshun napi uaid nibëdosh.” Adec Nuquin Papan meniaidtedi bëdambo yampicpadec aton na dadpen icquidbëdi ambi meniaido bëdambo yampec.

### *Tito Codinto yacno nidte*

<sup>16</sup> Nēbi Tito mibi chuinu. Tantia. Ēbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bēdambo iquec, Papa, quec tsadebi.

<sup>17</sup> ¿Codinto yacno tsutsi nidpatsiash? quequin ěmbi chiac, Ēbibi nidebi, quiosh Tito.

<sup>18</sup> Tito mibi yacno nidnuesho tantiashun nuqui con utsi caid utsi Titobēdi nidta caombi. Aidi Esuquidistu chuibanquid nec, quequin utsibon chiec. Bēdambocquid nec.

<sup>19</sup> Nidaid Masedonia caid yacnocquidon, Esuquidistu tantiec iccuededquidon ěmbi dayun uaid Pabadobēdtan buanec nid caidbidi Titobēd nidquid nec.

<sup>20</sup> Aid daēd ēbēdi nidsho isash, Nuqui na buanquin ampetsiash, quetiapimbo utsibo iquec.

<sup>21</sup> Nuquin Papan tantiamiacpaden aidobēdtambi bēdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobēdtambi buanshunembi.

<sup>22</sup> Tsyuec nidebi, quequin utsibobēdta Tido mibi yacno nidmembi. Ēmbi nata cac bēdamboen nabanquid aidtedi nec. Mimbi chiacpadomboen nashunquido Codinto yacnocquido nec, quec aido mibi yacno nidec.

<sup>23</sup> Mibi nashunquin ēbēdtambi Esuquidistu chuibanquid Tito nec. Aidbēdi Esuquidistu tantiaquid utsi nidec. Esuquidistu tantiec iccuededquidon nēuēshquio puduanec Codinto yacno nidta caboedi Titobēd nidec.



24 Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Ęmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiapanuna.

## 9

1 Ęnden Esuquidistu tantiaquid utsibo tantiaquin nashunta quequin ěmbi chiac,

2 Adonona, qeshun mitsana bedbanquin mimbi tauaondac. Adsho isun nidaid Masedonia yacnoěsh Esuquidistu tantiec iccuededquido mimbi menenuequin chuibocpadomboen chiombi. Abentsěcshun-abentsěcshunquien menebanquin dayun uanuna, quequin seta utsin mimbi chuibocpadomboen ěmbi chiac Masedonia yacnocquidotsen, Adomboembidi nabanembi, queoaposh.

3 Aden aidon chuisho tantiashun nuqui con utsi caido mibi yacno nidmembi mimbi chiondacaden bedbanambo icnushe qeshun.

4 Nidaid Masedonia caid yacnoěsh Esuquidistu tantiec iccuededquido ěbědien tsyuec mibi yacno nidchitec. Aidobědi mibi yacno choshon ěmbi chiacpaden mimbi bedbanambocsho isash, Abimbo chiacbimboen chuichitombi, quec natiaic běpiutsiabi. Adquiecbidi mibi icoaic.

5 Adquo icnushe qeshun utsiboba mibi yacno nidmembi. Aido mibi yacno choacsho mimbi chiondacted bedbanquin dayun uaid mimbi ismetsiac, Abimbo chiombi, quequin. Aido chonoc mimbi chiacted bedbanquin dayun uambochoeděmbi něbi mimbi bedbampec.

Aden mimbibi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantiec unësquio icquin menetsiash. Aden tantiaquin menenda.

*Nuquin Papan na dadpen bedmiaidën aton na nibëdquid menequid*

<sup>6</sup> Nuquin Papan chiaid chuinu. Adembi tantiata. Tied icbon daëdpactsëc nitsinac caniash ëshëacsho aiddtedtsëcbidi bedpec; dadpen ambi nitsinac caniash ëshëacsho dadpen bedpec.

<sup>7</sup> Adquiobidi aton na icquid iqueque. Tantiata. Chuinu. Nëidted menenuequin ambi chiac ted menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiac ted meniash, Bëdambo iquebi, quetiapimbocquin menec.

<sup>8</sup> Mitsana menete bunquin mimbi chiac ted menesho isun Nuquin Papan uesadmenquiocquin mimbi bedmec ma utsi-utsien menebampanueshun.

<sup>9</sup> Nuquin Papan dada uamiampid adomboembidi chiaid nad iquec:

“Nuquin Papan dadpen bedmioshi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboed Nuquin Papan chuibanendac.”

<sup>10</sup> Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid

tiedën caniquid ëshë abentsëc siaid dadpen yanec. Matsesën petequid adquecbidi dadpen yanoaic. Adecbidi utsi menequid mibi icscho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneopec.

<sup>11</sup> Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

<sup>12</sup> Nuquin Papa tantiaquid icquin aton na nibëdquid Esuquidistu tantiaquid dadpen icscho menebanquin mimbi bëdambo icmiaid dadpen iquendac. Adembidi, Nuquin Papa bëdamboshë iquec, quequin aidon chuibanendac.

<sup>13</sup> Meniacsho isash, Esuquidistu tantiaquid nebi, quequin abimbo chuiquidquio aid nec, quequin mimbi meniaidbëdtambi utsibon mibi chuibanendac.

<sup>14</sup> Adquidquio nec, quequin utsibon mibi chiec. Mimbi tantiamiacpadomboen nabanquidquio Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac.

<sup>15</sup> Aden aidon chuinubi naden nuqui Nuquin Papa chiec. Mimbi chomiaid Esuquidistu ëbi bëdambo icmenuec ëbi icsaid bedshunash abided cuidadec unësash uincuempanëdash. Aidpadquid utsi nibëdec, Papa, quequin nuqui chiec.

*Ĕmbi dada uacpaden mibi yacno choshon adom-boembidi nabanembi quiaid*

<sup>1</sup> Comapenec chushquenquiocquin matses bēdamboen tabadmenuequin chuibanquid Esuquidistu icpanēdash. Mibi yacno choshon Esuquidistupadquid icnuequin ēbi chieshēnquid bēdamboen tabadmenuequin chuibanendambi. Ĕbi chieshēnquido nadec onquequin ēbi naden chiec, quec. Nuquibēd tabadquin dacuēdabimboecquin comapenen Pabadon chushcainquio iquec. Utsi yacno nidshun dada uaquin comapenen chushcaic, quiosh. Mibi chiec adosh.

<sup>2</sup> Adsho tantiash mibi yacno choash tabadquin chushcante bunenquio icquimbi, Ambibi tantiacpaden nabanquid Pabado nec, quequido bēdamboen chuibanembi.

<sup>3</sup> Esuquidistu tantiaquid yanshun icsaquidēn tantiacpaden nabanesa nebi.

<sup>4</sup> Mibi yacno choshon matsesēn tantiacpadpenquiocquin Nuquin Papan tantiamiacpaden ēbi chieshēnquido Satanasēn icsamboen tantiamiaido Nuquin Papan chiaid chuibanendambi.

<sup>5</sup> Satanasēn tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibēdec, qeshun Ĕmbibi tantiacpaden naic bēdambo iquec, quequin tantiamiaido nec. Aden tantiaquid icsho isun ambi icsamboen tantiec pamumēdabimboe yaid Ĕmenu quequin Nuquin Papan chiaid Ĕmbi chuibanubi abi pamumēdabimboe yaid padpidec pausudtiapimboenoc paucbanshun ambi tantiacpaden Nuquin Papan pausunendac

ma ambi chiacpadomboen namenuquin.

<sup>6</sup> Aden chuibanshun Nuquin Papan chiacpadomboen utsin-utsinuien abi icsaid ënabicsho isun comapenen cuidendambi.

<sup>7</sup> Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquo isadtsec, quepec aido. Aden chuiquido, Esuquidistu tantiaquid nebi, ëbi qesho tantiash, Muec nec, quetiapimbo iquec.

<sup>8</sup> Abi tantiaquid ëbi yansho, Esuquidistun, Ëbi chuibeneta, cashumbic abi tantiaquido abi tantiadonequid icmenuquin chuibanquidbidi icmiondashi. Adquid icmiac ambi chiaid ëbi chieshënquido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ëmbi chiacpaden naimbi mibi yacno choshon caimbi.

<sup>9</sup> Adquid nebi, quequin, Dacuëdampambocquid Pabado nec camenuen dada uainquo iquemb.

<sup>10</sup> Mibi aden dacuëdmenu, quenquo icnubi ëmbi dada uaondaid bedshun isun naden utsin ëbi chiosh quec. Chuiquidën comapenen chushquequin chiacpadomboen Pabadon dada uaic. Nëmbo choshon ambi dada uaquin chiacpaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istsëccombi. Tantiatiapimbo noc chuibanondash, quequin aidon ëbi chiec.

<sup>11</sup> Aden ëbi chiec onquequidën bëdamboen tan-

tiata. Chuinu. Ęmbi dada uacpaden mibi yacno choshon adomboembidi nabanembi caimbi.

<sup>12</sup> ¿Esuquidistun, Ębi chuibeneta, caid nebi, quepecta ěbi chieshěnquido iquec? ¿Adenda Esuquidistun, Ębi chuibeneta, caiděnquio utsi icsamboen chuipec? ¿Esuquidistun, Ębi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquio iquebi. Esuquidistun, Ębi chuibeneta, caid nebi, quec muaid chuiquin abipadquid utsibědtambi icsamboen nabanash, Nuqui bědamboen naoc, cananec. Ambia icsamboen nabanquiděn chuibanquin ismiac ambibi tantiacpaden nabanec abipadquid yanquidon.

<sup>13</sup> Ębien Nuquin Papan tantiamiacpaden chuibanquid nec. Ambi tantiamiacpaden mibitedi chuibanquid nebi.

<sup>14</sup> Codinto yacno nidshun anouidi tabadquin Esuquidistu chuiban, Nuquin Papan cac miběd tabadquin chuibanondambi.

<sup>15</sup> Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ěmbi chuibanaido nec, quenquio iquebi. Mibědi tabadquin ěmbi chuibanac aid tantiaquid mibitedi yanondac. Adsho isash Esusquidistu tantiadonequidquio yampashun, quec mibi tantiec tsadebi.

<sup>16</sup> Esuquidistu ěmbi chuiban-chuibanac aid tantiadonequiec mibitedi tabadsho isash Esuquidistu utsin chuibanacmanombo

chuibanoaic nidendabi caombi.

<sup>17</sup> Aden Esuquidistu chuibanac, Ĕbibi bēdambo ictiapimbocquid mimbi bēdambo icmiaid nebi, Papa, quequin ma Nuquin Papa Esuquidistu tantiaquidtedishun chuipanuna.

<sup>18</sup> Bēdamboen nabanombi, abibi qesho Nuquin Papan bēdamboen istiapimbo iquec. Ambi, Bēdamboen mimbi naoc, caiduidi ambi bēdamboen isaidquio nec.

## 11

### *Pabado muesa icnubi muaquido*

<sup>1</sup> Nēbi ěmbi dada uaid isash, tantiesa onquiabimboen mamēmenuequin Pabadon chiec, quenquiocpashun caimbi mibi. Aden tantiatsiash, quequin abi dada uaimbi. Nēid bedash ěmbi abia dada uaondaid isec mibi onquiapadec nēbi nēid mimbi iste dada uaid isec onqueta.

<sup>2</sup> Nuquin Papan tantiamiacpadec mibitedi cudasquidquio nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amēn aton champi chiacbimboen, Esuquidistun bednu caid yec icsamenuequidēn, Bednu, cac, Bedadenda, caimbi. Esuquidistu ěmbi chuibanaido mibitedi bedec choeque.

<sup>3</sup> Ĕmbi chuibanac Esuquidistu tantiauidquimbi nisi bēdambo isadacbimboecquidēn muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi.

<sup>4</sup> Adec ëbi tsadnubi Codinto yacno choshon utsin Esuquidistu ëmbi chuiboed utsi uain chuisho badedquoio tantiec aidon. Adembidi, Mayan utsi iquec, qesho tantiash, Ëbi mene, quec mibi. Adembidi, Mibi bëdambo icmequid Ësus utsi iqueque. Aid tantiata, quequin ëmbi chiaid utsi uain chuisho, Abimbo iquec, quequin tantiec mimbi. Aden utsibon ëmbi chuiboed utsi uain chuisho tantiec, qesho tantiash Esuquidistu tanta uatsiash, quec tsadebi.

<sup>5</sup> Esuquidistun ëbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bëdamboenshë utsibon chuibanacpaden Pabadon chuibanenquoio iquec, qesho tantiash, Icsamboen chiombi, quetiapimbo iquebi.

<sup>6</sup> Utsibon bëdamboenshë chiacpadec Pabado onquenquoio iquec, mibi quenuc Esuquidistun, Ëbi chuibeneta, quequin ambia tantiaquidën tantiamiacpadomboen mibitedi chuibanombi bëdamboen tantiaquin.

<sup>7</sup> ¿Codinto yacnocquido ma Esuquidistun bëdambo icmepanueshun chuibanequi, Bec cho, quenquoio yectabi icsape?

<sup>8</sup> Mibi Esuquidistu chuibanu quiash Esuquidistu tantiec iccuededquid utsibon na ampiacbimboec tabadobi. Aidon aton na meniaqui aido nashunenquoio yec mibi yacno nidash tabadquin mibi nashunquin Esuquidistu chuibanondambi.

<sup>9</sup> Adec mibi yacno tabadquin Esuquidistu chuibanec bunec tsadec, Bec cho, quenquoio iccondabi. Nidaid Masedonia caid yacnoësh



choquidëmbini meniondash. Aden ënden, Bec cho, mibi cainquio iccondacpadec nëbi adquiecbidi tsadebi.

<sup>10</sup> Esuquidistun chuimiaidquio nebi. Adquid icquin adquid nebi quequin chiembi mibëdi nidaid Acaya caid yacnocquid utsitedi, Padi. Aden chienda, quetiapimboenoc.

<sup>11</sup> ¿Atotsi quiashini, Bec cho, quenquio icpe? ¿Mibi tantienquiocquindambi mibi, Bec cho, cainquio icpe? Mibi tantiec tsadebi. Codinto yacnocquido Pabadon tantiaid nec, quequin Nuquin Papan tantiec.

<sup>12</sup> Aden mibi tantiaquin, Bec cho, cainquiocquin Esuquidistu chuibenec nebi mimbi bëdamboenshë chuibanquid caid: Pabado nabanec tabadacpadec tabadebi, quetiapimbo icnubi.

<sup>13</sup> Aido Esuquidistun ëbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec.

<sup>14</sup> Aido tantiaequin ismequid Satanus nec. Nuquin Papan abi yacnoshon uaid mayan bëda aidbëdi tabadquido icsaisa yacpadquid nebi, quequin abipenquiocnoc chuiquin ismequin tantiamiac

<sup>15</sup> adquiecbidi ambi namiaidtedi bëdambocquidbimboec capucuededec. Cuidte ushë chonoc aido icsaid Nuquin Papan comapenen cuidquin chiendac.

### *Pabadon abi mëyanaid chuibanaid*

<sup>16</sup> Adembidi chuinu. Tantia. ¿Mamëmenuequin tantiesa onquiacbimboendambi ëbi icaid chuibandio? ¿Utsin aden chuibansho tantianu,

quepecta mibi ictsia? Aden chuibanenquiocquin  
ëbi icaid chuibanuna,

<sup>17</sup> Chuita, Nuquin Icbon cainquiocnobi.

<sup>18</sup> Abi icaid utsin-utsinquien chuibanec, que-  
quin tantiaquin adomboembidi ëbi icaid chuiba-  
nuna.

<sup>19</sup> Bëdamboen tantiaquidquio nebi, queshun  
mamëmenuequin ambembi chiacbimboen chuisho  
tantiec mimbi.

<sup>20</sup> Ambembi chiacbimboec, Yuanu, quesho  
tantiaash icsamboen tantiaquidbimboec mibi  
yuadte bumpec. Ambembi chiacbimboec, Bec  
cho, quesho icsamboen tantiaquidëmbimboen  
menebanec mimbi. Muaquin chuiquin mitsana  
bedshunaqui cacuidenquio yec tabadec mibi.  
Aden mitsana ambembi isash, Mibi chuiquid  
nebi, quesho tantiaash, ¿Tsuntsin mibi adquid  
icmiosh? quenquiocquin aidën chiacpaden  
nabanec mimbi. Aton yuabimboecnuc mibi  
mëyanaqui, Min yuapenquio nebi, quenquio iquec  
mibi.

<sup>21</sup> Nuquin Papan yua icta cac, Padi, quetsiash,  
quequin aden mibi chuitiadquidëmbi chienquio  
iccondambi.

Mibi yuanuequidon ambembi abi icaid  
chuibanac. Adomboembidi Pabadon abi icaid  
chiec, Codinto yacnocquido quetsiash, quequin  
tantiaquin ëbi icaid chuibanu. Tantia.

<sup>22</sup> ¿Mimbi bëdamboen chuiquid nec caid,  
Isadaidbo nebi, quepecta iquec? Adembidi, Ëbi  
isadaidbo nebi, caimbi. ¿Abadauanën tsyuecquid  
nebi, quepecta aido iquec? Adembidi, Ëbi  
Abadauanën tsyuecquid nebi, caimbi.

23 ¿Esuquidistu chuibanquid nebi, quepecta aido iquec? Ëbibi Esuquidistun ëbi chuibeneta caidquio nebi. Esuquidistu chuibanquid ëbi yacpadquid utsi nibëdec. ¿Mibi mamëns humenuequindambi aden chuipadi? Padenquio. ¿Ëbi yacpadquid utsida iqueque? Tantiata. Chuibanu. Utsi bëdiactsëc chonoadnuc comapenec chonoadobi. Adecbidi quënën nauedauid utsi icnubi quënën nauedteni-aid nebi. Adecbidi utsi bëdiactsëc cuesaid icnuc yuen cuesto-cuestoaid nebi. Mëyanac unëstsenobi, utsi quenubi aden mëyanac unëstsen-unëstsemboedi nebi.

24 Isadaidbon cueshcanten 39ted tambanquin cacuestoniondashi. Yuecshun aitedembidi. Yuecshun aitedembidi. Yuecshun aitedembidi. Yuecshun aitedembidi yuenquio cacuestonioshi.

25 Adembidi cuesten cuesoshi. Yuecshun padpiden. Yuecshun padpiden. Adembidi cuënoten se-sioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi.

26 Adecbidi quenenenquio yec capucuenequin Esuquidistu chuibeniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquio yec matses nibëdacno capucueniobi. Adecbidi acte dapan capucueniobi. Esuquidistu

tantiaquid nebi, quequin abimbo chiacimboen  
chuiquidën unës uachitoshe, quenquo yec  
capucueniobi.

<sup>27</sup> Con na bednuec chonoadec uëshquiobi.  
Padpiden-padpidemboen ushenquo icquin  
chuiabanombi. Piasec acte bunquin adembidi  
Esuquidistu chuiabanombi. Iquenquimbi  
chuiabanombi. Dashcute icsactsëcquid  
dasiuidquimbi chuiabanombi. Yuedenquo yaqui  
adembidi chuibudombi.

<sup>28</sup> Ęmbi chuiboed Esuquidistu tantiaben-  
abicquido icpec, quequin capucuenequin  
chuibeniombi. Utsi yacno nidshun, Ęmbi  
chuiboedo bēpiscudnushe qeshun mibitedi  
chuiquin dada uaombi.

<sup>29</sup> Esuquidistu tantiaquid chieshec  
dayactiapimbo icpec. Adquiobidi iccobi,  
quequin tantiec tsadebi. Esuquidistu tantiaquid  
icsaosh, qesho tantiash unësquo yec, Nēbimbobi  
icsamianquid comapenen cuidta, Papa, quec  
tsadebi.

<sup>30</sup> Aided ëbi icaid icnuc chieshenquo yec  
ëbi dayacquio yaid chuiabanombi. Nēbi ëbi  
cuenondaid chuinu. Tantia.

<sup>31</sup> Abia Yampidën, Nuquin Icbo Esuquidistun  
Papan nabanaid ënenquiocquin chuitequidquo  
iquec. Aidën nabanaid chuiabanec muesa Pabado  
nec, quequin ëbi cuenondaid Nuquin Papan  
tantiec.

<sup>32</sup> Ębi cuenondaid nad icpondashe. Chuinu.  
Tantiata. Damasco yacnocquido ancanquidën  
Adetas cuëmëdquidën Pabado Damasco yacnoësh  
pduensho bedta quequin shubu dadpen

daquënë uaid dapa shëcuëtedi sondado  
ëctabëdmepondash.

<sup>33</sup> Adec daquënë uaid shëcuë cuëmanquio son-  
dado tabadnubi bednushe queshun abuc daquënë  
uaid iste shëcuënshun tsitsan dapa antsadunshun  
daquënë uaid cachoc budmepondashi. Budmiac  
ancanquidën bedadtiapimbo yec cuempondabi.

## 12

### *Nuquin Papan Pabado ismiaid*

<sup>1</sup> Ëbi icaid chuibanquin ëmbi dada uaid is-  
banash, Esuquidistun ëbi chuibeneta caidquio  
Pabado nec, quequin Codinto yacnocquidon tan-  
tiatsiash, quequin adobamboedtedi chuibanquin  
dada uaombi. Ëbi icaid chuibanquin ëmbi dada  
uaid isash, Abi natiamiaid dadpen icpec, quet-  
siash, quenquiocquin dada uaombi. Adembidi  
Nuquin Papan ëbentsëqui ismiondaid chuinu. Tan-  
tia. Nad iccondashe.

<sup>2</sup> Ëndenquimbo seta 14ted matamequin Nuquin  
Papan bëdamboshë yacno indopondashi. Intac-  
chobi abuc indopondashi, quetiapimbo iquebi.  
Tantienquio iquembi. Adecbidi ëmbi tantiateuidi  
indoac, quetiapimbo icoaibi. Tsaudi, tantienquio  
iquembi. Nuquin Papambien tantiec.

<sup>3</sup> Abuc bëdamboshë yacno indopondashi, que-  
quin abimbo chiembi.

<sup>4</sup> Abucshun utsi chuitemaidquio tantiapon-  
dambi. Ëmbi tantiondaid chuitiapimbo icpebi.  
¿Mitsipadentsimbi ëmbi abucshun tantiaboed con  
onqueten chuipatsiaba?

5 Bëdambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bëdambocquid nebi, quetiapimbo iquebi.

6 Abuc nidshun ëmbi isondaïd chuibanquin dada uaid isash, Bëdambocquid Pabado nec, quequin tantianushe queshun padenquo iquemi. Èbi bëdamboec tabadsho isash, Pabado bëdamboec tabadec, quesho tantiash bëdambo ictsiabi. Adecbidi chuïbansho tantiash, Abimbo chuïquidquo Pabado nec, quesho tantiash adecbidi bëdambo ictsiabi.

*Satanasën natiamiaïd*

7 Bëdambocquid yansho Nuquin Papan abuc indoshon ismiondashi, quequin Pabadon chuïnushe queshun Satanasën chomiaïdën ëbi natiameded-natiamededsho isash, Chën, quenquo Nuquin Papa iquec. Satanasën chomiaïdën natiamiac pinchuquën siadaïd namin nidaëdaïd chictiapimbo yacbiïmboec con dada bëdanenquo iquec.

8 Adec con dada bëdantiapimbo icnubi, Èbi natiamequid cueme, Icbo, quequin chiondambi. Adshumbic, padpiden. Adshumbic padpiden adombombidi chuided-chuidedondambi.

9 Adoaquien, Padi. Bëdambocquid icmenuequin naid nec. Mibi dayacquio icmequid con Mayan mibëdi iquec, quequin Nuquin Icbon chiondashi. Adoaqui, Bëdanambo icsho Nuquin Icbon ëbi dayacquio icmec quequin tantiec bëdambo iquebi, quec tsadebi.

10 Aden tantiec con dada icshambo icnubi Esuquidistu chuïbenec capuebi. Èbi icsamboen

chuiquin mamënshunaqui adecbidi Esuquidistu chuibenec capuebi. Utsin natiamiaqui adquiecbidi Esuquidistu chuibenec capuebi. Utsin mëyanaqui adquiecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquo icmiac tsadiapimbocquin chuibenec capuebi.

*Esuquidistu tantiabemenuen chuibanombi quiaid*

<sup>11</sup> Ëbi yacpadquid utsi nibëdec, quequin chienquioctiadquidi niobi. Esuquidistu chuibanquid utsibon chiaid tantiatequidquo iquec, qeshun mibëd icquidon ëbi icsamboen chiosh qesho tantiashun Pabado Esuquidistu chuibenequid nec, quenquo utsibo iccosh, qesho tantiashun ëbi icaid chuibanquin dada uaombi. Bëdamboen tantiacbimboen chuibanquid dadpen iquec. Aidon icfactsëcquo isadtsec, quequin ëbi chiec onquenubi Esuquidistu chuibenequidquo nebi.

<sup>12</sup> Natiamiaqui chieshenquiocquin Esuquidistu ëmbi chuibansho mibitedishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistun ëbi chuibeneta caidquo Pabado nec, quequin chuitiadquidëmbi padenquo mimbi icpondac.

<sup>13</sup> ¿Esuquidistu tantiec iccuededquido utsi tantiaquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquo iccondabi. ¿Bec cho, qeshoda ëbi bëdamboen mimbi tantiatsemponda?

14 Ĕnden mibēdi tabadondabi. Yuecash padpidec mibēdi tabadoapondabi. Nēbi padpidec mibi yacno nidendabi. Mibēdi tabadec adecbidi, Bec cho, quenquo iquendabi. Mitsana bunesa nebi. Esuquidistu tantiaquidquo ma icpanu quequin mibēdi tabadquin chuibanendambi. Aton bacuēbo tantiaquin amēn anibēdtan ambia tantiaquid icquin tied uaic adembidi shubu uaic bacuēmpibon nabantiapimbo icnubi.

15 Adquiobidi mibitedi tantiec Esuquidistubēd icquido yampec quec chonoadec tsusiobudquimbi chuibenendambi. ĴĔmbi mibitedi comapenen tantiasho isunda mimbi ēbi tantienquo yampe?

16 Bec, cho, quenquo yec mibēdi tabadondabi. Adsho isash, ĴPiucquid bedenquo icpecta Pabado tabadash? Muaquin chuiquin bedpash icnui, quec mibi.

17 ĴMitsipadentsimbi bedpa? ĴĔmbi mibi yacno nidmiaidonda muaquin chuiquin mitsana bedpash? Padenquo.

18 Titobēdta utsi mibi yacno nidmiondambi. ĴAdoac mibi yacno choash tabadquin muaquin mitsana ampequinda ictiosh? Ma padenquo icboc. Aidbēdi abentsēc yacimboen tantiaquidquo nebi. Aduidequi tabadquid ēbi daēdi nebi.

19 ĴPabado ampesa nec mibi camenuendambi dada uaqin chuibampo? Padenquo. Esuquidistu tantiaquid icquin mibi aid tantiabemenuen chuibanombi. Ĕmbi chuibanaid abimbo iquec, quequin Nuquin Papan tantiec.

20 Mibi yacno choash ēbēdi abentsēc



yacbimboen tantienquo icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibēdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquo chuisho tantiamane qeshun adembidi dada uaimbi. Bēdambo icquid ēbi icnubi utsi padenquo iquec qesho tantiamane qeshun adembidi dada uaimbi. Mimbi tantiacpadpenquiocquid icsho isash comapenec cuēdcuededsho tantiamane qeshun adembidi dada uaimbi.

<sup>21</sup> Ai, mibi yacno choashun adquid icsho isun, Ēmbi Esuquidistu chuibanaiido nec, quequin Nuquin Papa chuitiapimbo yec natiaic bēpiuacbimboec tsadmane qeshun dada uaimbi. Icsadenequidēn abi icsaid ēnabi icsho isash aido unēsacimbocquid nec, quiaish unēsquo icmane qeshun dada uaimbi. Aidon naid utsin istemaidquo nec. Ambibi ambi chudtemaid chudted-chudtedec icsambo yequi, Bēdambocquid nebi, quec muacuededec.

## 13

### *Icsaid ēnesa chuiquin cuidendambi quiaid*

<sup>1</sup> Mibi yacno daēdec puduedashic padpidec puduedendabi. Choshon, Icsadenequid iquec, quequin daēdshun-daēdshunquien chuisho tantien-dambi. Abentsēcshun: Icsaquid iquec, quequin chuisho tantiatiapimbo iquendabi.

2 Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ënta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobëdta comapenen chuiquin cuidembi, quequin chiondambi utsitedishun tantianubi.

3 Esuquidistun tantiamiacpaden Pabadon dada uaid nec, quequin ¿mitsipadentsimbi tantiape? quequid comapenec onquequin chuibanembique. Tantiaquiota, caimbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi.

4 Aidi matsesash nadatiapenquio icquid-bimboecsho isun cuesten dectampanëdash. Adoacsho Nuquin Papan uincuemiatic unësesa yanquiopanëdash. Aid tantiaquidquio icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

5 Esuquidistu tantiaquid nebi, qeshun ¿mitsipadentsimbi aid tantiape? Adecbidi, ¿Ambi chiacpadectabi tabadpe? qeshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, qeshun Esuquidistu ëbëd ictiapimbo iquec, quequin tantiata. Aid mibëd icnuc ambi chiaid niac-niaquenquio mimbi iquendac.

6 Adecbidi, Pabado Esuquidistun ëbi chuibeneta

caidta neque. Isnu, quequidën ëbi nabanec tabadsho isun, Pabadon abimbo chiosh, capashuni mimbi.

<sup>7</sup> Aden tantiaquin Codinto yacnocquido bëdamboen tabadmeta, Papa, quequin chuided-chuidedembi. ¿Mibi bëdamboec tabadsho isash, Pabadon chuibanaiado nec, quequin mibi isquidon chuitsiash, quequindambi Nuquin Papa chuided-chuidedpadi? Padenquo. Esuquidistun ëbi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquo Codinto yacnocquido nec, quequin utsibon chuisho tantiatadquo iquebi.

<sup>8</sup> Nuquin Papan chiaid abimbo iquec, quequin ambi chiaidquo chuibanquidquibidi nebi. Ambi chiaid utsi uain chiesa nebi.

<sup>9</sup> Mibi bëdamboec tabadsho isash bëdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi.

<sup>10</sup> Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibëdsho isun comapenen chienquo icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi.

<sup>11</sup> Nëbi ënquin dada uaimbi. Icsaisa icnu quec Nuquin Papan chiacpadec bëdamboec tabadta. Ëmbi dada uain chiaid isquin adobanta. Abentsëc yacimboen tantiaquin nabanec tabadteneta.

Adec tabadsho isash tantianquidquio utsibëd bëdamboec tabadquidquio Nuquin Papa mibëdi iquendac. Aidënquio mibi adquidquiobidi icmendac.

<sup>12</sup> Èbi isec cho cananta.

<sup>13</sup> Mibi tantiec tabadebi, quec nëmbo tabadquido Nuquin Papan bëdambo icmebanaido.

<sup>14</sup> Nuquin Icho Esuquidistun bëdambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan ëbëd iquec, quequin tantiaquiota.

Padi. Aidedi dada uaimbi.

## **Esuquidistu Chuiquin Tantiamete New Testament in Matsés (PE:mcf:Matsés)**

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

### **Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Matsés

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

446da786-5bd1-5ffa-85e2-9eff4052cf8b